Акафист свытителю Нектарию,

митрополит Винтапольском Кгинском чудотворцу

Кондак 1

Взбранный Нектарие Пентаполя митрополите и Эгинский чудотворче, приносим ти прошения о болящих сродниках наших: изряден бо явился еси целитель раковыя язвы и прочих недугов, всей вселенней благодать даруя, сего ради единеми усты и единем сердцем воспеваем ти присно: радуйся, Нектарие, Архиерею Божий.

Икос 1

Ангела хранителя во святем крещении обретый, от младых ногтей равноангельскаго жития возжелал еси, отче наш Нектарие; ныне же со Ангелы зрением Славы Божия наслаждаяйся, моли всех Ангелов Владыку о поющих ти сицевая:

Радуйся, венчанных родителей плоде благословенный;

радуйся, от чрева матери Богом освященный.

Радуйся, издетска навыкший послушанию;

радуйся, от юности изучивый Писания.

Радуйся, Божиих словес одушевленная книго;

радуйся, живая боголюбия скрижаль.

Радуйся, Богом избранный за кротость и смирение;

радуйся, дом оставивый духовнаго ради учения.

Радуйся, яко тебе ради буря зельна на мори утишися;

радуйся, яко поясом твоим надломленная мачта укрепися.

Радуйся, орля юное, имуще криле умныя молитвы;

радуйся, елене, взыскавый источники покаяния.

Радуйся, Нектарие, Архиерею Божий.

Кондак 2

Видящи тя на воздусе молящася, черница некая престрашна бысть, Боголюбче; ты же дар молитвы сокрывая, уста девы клятвою запечатлел еси Господу в сердце воспев: Аллилуиа.

Икос 2

Разум Христов молитвою стяжал еси, святый Нектарие, во еже разумети, что есть воля Божия, благая, угодная и совершенная; научи и нас на всяком месте воздевати руки к Богу без гнева и сомнения, да приимеши от нас похвальная:

Радуйся, во юдоли плачевне восхождения положивый;

радуйся, плоды Духи израстивый.

Радуйся, чадо горы Афонския;

радуйся, ключу молитвы Иисусовы.

Радуйся, древляго благочестия светило;

радуйся, граде Святыя Троицы.

Радуйся, благодатию осененный; радуйся, Херувиме огненный.

Радуйся, соль земли обетованныя;

радуйся, слезами сеявый, пожавый радостию.

Радуйся, на немже процвете святыня Христа;

радуйся, яко Бог благодействова тя. Радуйся, Нектарие, Архиерею Божий.

Кондак 3

Силою Вышняго облеченный, отче Нектарие, силу словес Христовых утвердил еси: во Царствии Моем, — Той рече, — ни женятся, ниже посягают, но яко Ангели на небеси, выну поют: Аллилуиа.

Икос 3

Имущи Пречистая Богородица в услужении все воинство небесное, тебе, угодниче, аки Ангела во плоти, воспевателя чудес Своих постави: мы же, Мариин омофор над тобою зряще, со страхом и любовию припадаем ти:

Радуйся, тайный избранниче Богоматере;

радуйся, велений Ея исполнителю.

Радуйся, духа кротости от Чистыя Голубицы приявый;

радуйся, в песнех духовных Приснодеву прославивый.

Радуйся, учай угождати неба и земли Царице;

радуйся, молитвами Матере милость у Сына обретый.

Радуйся, мерило праведности и мудрости палато;

радуйся, высото рассуждения и смирения глубино.

Радуйся, Эгинский крине, нектар покаяния точащий;

радуйся, Эдемская пчело, медом богословия нас снабдевающая.

Радуйся, мироварнице, миро изливающая;

радуйся, чаше духовного омовения.

Радуйся, Нектарие, Архиерею Божий.

Кондак 4

Раковую язву кровоточащу на груди имея, иерей храма твоего, Нектарие, смятеся, егда ты явлься облобыза его, аки во плоти сый; он же исцеление получив, тебе невидиму бывшу, со слезами возопи Богови: Аллилуиа.

Икос 4

Слышаша мнози о дивнем исцелении, при жизни тобою содеянном, егда во стране Канадстей, святей Литургии служиме, в Дусе явился еси, чудотворче Нектарие, и расслаблена некоего мужа воздвигл еси, к Чаше его призывая; той же здрав бысть, веси Эгинския достиг и, тя во плоти узрев, велегласно взываше:

Радуйся, врачу гостеприимный, Греции похвало;

радуйся, Николая Чудотворца славу стяжавый.

Радуйся, кладезю благостыни;

радуйся, милосердый самарянине.

Радуйся, даром чудес обогащенный;

радуйся, посещаяй люди смиренныя.

Радуйся, утешаяй нас чудесы неложными;

радуйся, яко невозможная другим тебе возможна.

Радуйся, яко скорби наша на радость прелагаеши;

радуйся, ты бо от очей наших слезы отираеши.

Радуйся, одержимых бесы свободителю;

радуйся, раковыя язвы исцелителю.

Радуйся, Нектарие, Архиерею Божий.

Кондак 5

Боготечною звездою покаяния возшел еси, отче, над вселенней, лучи сокрушения о людских беззакониях выну испущаяй; озари умы наша к зрению грех наших, да умилостивим Владыку пением: Аллилуиа.

Икос 5

Видеша отроковицы чистыя Архиерея своего, в лепоте души и тела Богу предстояща, и познав в нем великаго молитвенника и чудотворца, согласно возгласиша ти, святителю Нектарие:

Радуйся, Христа присное жилище; радуйся, Духа дивное сокровище.

Радуйся, царское священие Великаго Архиерея;

радуйся, призванный к Престолу Вечнаго Царя.

Радуйся, Плоти Христове сотелесниче;

радуйся, Крове Святыя причастниче.

Радуйся, глашатаю покаяния; радуйся, ходатаю о нас пред Богом.

Радуйся, Нектарие, Ангелы веселяяй;

радуйся, пламеню, демоны пожигаяй.

Радуйся, пучино щедрот; радуйся, море чудес преславных.

Радуйся, Нектарие, Архиерею Божий.

Кондак 6

Проповедниче Единаго Благаго, Нектарие блаженный, тя, смирившася под крепкую руку Божию, Той превознесе; в страстном мори влающихся не забуди чад твоих, но на брезе смирения постави я, да возвеличат Бога твоего, воспевая: Аллилуиа.

Икос 6

Возсиявшу свету блаженств Христовых, от степени в степень востекл еси, богомудре Нектарие: кротостию и миром, воздержанием и любовию душу свою просветил еси, да от нас ныне слышыши сицевая:

Радуйся, носивый ризу смирения;

радуйся, обиды покрывавый прощением.

Радуйся, наслаждаяйся о множестве мира;

радуйся, наследуяй землю кротких.

Радуйся, фиале покаяннаго плача;

радуйся, чистоты сердечныя зерцало.

Радуйся, именем Иисусовым насыщенный;

радуйся, водами Писаний напоенный.

Радуйся, милость и суд возвестивый;

радуйся, любовию вражду упразднивый.

Радуйся, благочестивый житием; радуйся, гонимый правды ради.

Радуйся, Нектарие, Архиерею Божий.

Кондак 7

Хотя человек Божий совершен быти, Нектарие праведне, путь непорочных избрал еси: на Эгинстем острове житейское море, аки в ковчезе, преплавая, победительная воспевал еси Господеви: Аллилуиа.

Икос 7

Новаго Завета учитель изряден явился еси, слово Божие житием своим проповедавый: яко несть наша брань противу плоти и крове, но миродержателем тьмы века сего. Мы же о Господе возмогая, вопием ти, державне Нектарие: Радуйся, доблий воине Иисуса Христа;

радуйся, язво духовом злобы поднебесным.

Радуйся, вся оружия Божия восприявый;

радуйся, препоясавый чресла истиною.

Радуйся, яко нозе твои красны благовестием мира;

радуйся, яко на версе твоем утвержден шлем спасения.

Радуйся, щите веры, имже вернии ограждаются:

радуйся, мечу обоюдоострый, ереси посяцаяй.

Радуйся, победителю, от древа жизни вкушаяй;

радуйся, человече Божий, странный смерти вторыя.

Радуйся, свидетелю веры истинные; радуйся, райская ветвь спасения.

Радуйся, Нектарие, Архиерею Божий.

Кондак 8

Странное обретеся в тебе совершенство, точию совершенным в любве доступное; усоверши любовию души наша, любвеобильне Нектарие, да в мужа совершенна достигше, поем Богови: Аллилуиа.

Икос 8

Весь был еси в нижних, смиренным последуя, в вышних с Богом, сиречь с Любовию, пребывая; даруй нам, о, неботаинниче Нектарие, любве познание, во еже пети ти сицевая:

Радуйся, яко пленником содеялся еси любве Божия;

радуйся, яко чад своих любовию пленил еси.

Радуйся, выю под иго Спасово подклонивый;

радуйся, бремена ближних носивый.

Радуйся, в любве укорененный; радуйся, в милости утвержденный.

Радуйся, широту и долготу Креста разумеваяй;

радуйся, высоту и глубину Древа постигаяй.

Радуйся, разумниче любве, разум превосходящая;

радуйся, полноты Божия вместилище.

Радуйся, в уме держай елика истинна, праведна и честна;

радуйся, сердцем любяй елика пречиста, доброхвальна и прелюбезна.

Радуйся, Нектарие, Архиерею Божий.

Кондак 9

Всякое естество ангельское и человеческое удивися образу, великий Нектарие, в тебе явленному: яко несть во Христе ни иудей, ни эллин, ни раб, ни свободь, ни мужеск пол, ни женский, но нова тварь, Искупителю твари поющая: Аллилуиа.

Икос 9

Ветия многовещанныя умолкоша, житию твоему, святый отче Нектарие, дивящеся, како свят был еси, грешным ся именовавый; духовен был еси, из земли перстныя взятый: по смерти вознесен был еси, при жизни умом до ада низшедый; мы же отверзше уста, аки дети вопием:

Радуйся, главо, веру возвысившая;

радуйся, уста, безбожие посрамившия.

Радуйся, око, Боговедением просвещенное;

радуйся, деснице, могуществом Его укрепленная.

Радуйся, смиряяй кичливыя умы;

радуйся, сокрушаяй гордая сердца.

Радуйся, явивый силу в немощи;

радуйся, в слезах нашедый радость.

Радуйся, умерый и живый;

радуйся, земный и небесный.

Радуйся, горушное семя живота;

радуйся, зрелый класе Воскресения.

Радуйся, Нектарие, Архиерею Божий.

Кондак 10

Спасти хотя душу свою, яко деву, единему Жениху ту обручил еси; ныне же вшед в невестник Христов с лики девственных, Нектарие славне, поеши песнь: Аллилуиа.

Икос 10

Стена еси всем прибегающим к тебе, достохвальне Нектарие, имаши бо благодать немощныя врачевати и к небесному наследию возводити: нас убо, чад твоих, уврачуй и в Царствие Христово возведи, да вседушно речем ти сицевая:

Радуйся, старче благодатный;

радуйся, юниц путевождь преизрядный.

Радуйся, невинный пастырю невинных овец;

радуйся, мудрый собирателю девственных жемчужин.

Радуйся, вселенныя духовный окормителю;

радуйся, Евхаристии пламенный служителю.

Радуйся, гласе смиреннаго Христа;

радуйся, глаголе зиждительнаго Духа.

Радуйся, в терпении искушенный;

радуйся, скорбьми очищенный.

Радуйся, поборниче Божия правды;

радуйся, наследниче Христовы славы.

Радуйся, Нектарие, Архиерею Божий.

Кондак 11

Пение Богоматери приносил еси, угодниче Божий, Материю Света Деву именуя, ныне же совершение просветился еси разумением тайны воплощения, вознося горе глас: Аллилуиа.

Икос 11

Светом Божественныя славы просвещаема зрим тя, Нектарие, в чертозе славы: просвети одеяние душ наших Троическим сиянием, да воспеваем ти непрестанно:

Радуйся, каменю драгий Царевы диадимы;

радуйся, молние Носимаго на Серафимех.

Радуйся, яко светла заповедь, просветившая очи твоя;

радуйся, яко возлюбил еси ю паче злата и топазия.

Радуйся, сребро разжжено, очищено седмерицею;

радуйся, гусли духовныя, Спасова цевнице.

Радуйся, в сердцы имя Божие написавый;

радуйся, любовию подвиг веры оправдавый.

Радуйся, святыню Духа носивый;

радуйся, освятивый души, растленныя страстьми.

Радуйся, праведностию, аки виссоном убеленный;

радуйся, Троицы познанием озаренный.

Радуйся, Нектарие, Архиерею Божий.

Кондак 12

Благодать, от Бога ти данную, умножая умножил еси, рабе Божий, благий и верный Нектарие, темже и нас куплю духовную деяти сотвори, да обретше лихву, Христу воспоим: Аллилуиа.

Икос 12

Поюще твоя чудеса, пречудне Нектарие, вемы, яко Христос в тя богатно вселися, сего ради чудодейну десницу Его на нас низведи, глаголющих сице:

Радуйся, преемниче древних отцев;

радуйся, новый угодниче Христов.

Радуйся, Великия Церкве красото;

радуйся, всемирная надеждо.

Радуйся, себе уничиживый, Богом прославленный;

радуйся, в последних ходивый, первым поставленный.

Радуйся, дела обители точию знавый, егоже знает вселенная;

радуйся, чуждый дольния славы, небесною мздою почтенный.

Радуйся, иже по кончине недвижим лежай, недужна восстави;

радуйся, иже многим явивыйся, плач о кончине устави.

Радуйся, две златницы, монашества и священства, от Бога получивый;

радуйся, с лихвою цельбы и чудес злато Христу возвративый.

Радуйся, Нектарие, Архиерею Божий.

Кондак 13

О, священная главо, дивный врачу Архиерею Божий Нектарие! Приими ныне малое, обаче теплое моление чад твоих, благодати сущей в тебе верующих. Даруй нам недугов исцеление и от вечныя избави погибели, да Христу Спасу нашему взываем с радостию: Аллилуиа.

(Этот кондак читается трижды, затем икос 1 и кондак 1)

Кондак, глас 2-й:

Божественный гром, труба духовная, / веры насадителю и отсекателю ересей, / Троицы угодниче, / великий святителю Нектарие, / со ангелы предстоя присно, / моли непрестанно о всех нас.

Тропарь, глас 1-й:

Силиврии отрасль и эгины хранителя, в последняя лета явльшагося, добродетели друга искренняго, Нектария почтим вернии, яко божественнаго служителя Христова: точит бо цельбы многоразличныя благочестно вопиющим: слава Прославльшему тя Христу, слава Давшему ти чудес благодать, слава Действующему тобою всем исцеления.

Тропарь Святителю Нектарию Эгинскому, митр.Пентапольскому, глас 4:
Преподобнически пожив, яко мудрый иерарх, / прославил еси Господа / добродетельным житием, Нектарие преподобне. / Темже, Утешителя прославлен силою, / Божественными мощми твоими, / демоны отгониши и болящия исцеляеши, / верою приходящия ти.

Величание

Величаем, величаем Тя, святителю Христов, отче Нектарие, и чтим святую память Твою, Ты бо молиши за нас Христа Бога нашего.

Молитвы святителю Нектарию, митрополиту Пентапольскому, Эгинскому чудотворцу

Молитва первая

О, мироточивая главо, Святителю Нектарие, Архиерею Божий! Во времена великаго отступления, нечестию мир пленившу, благочестием просиял еси и главу прегордаго Денницы, уязвляющаго нас, сокрушил еси.

Сего ради дарова ти Христос врачевати язвы неисцельны, за беззакония наша нас поразившия.

Веруем: возлюби тя Бог праведнаго, да тебе ради нас, грешных, помилует, от клятвы разрешит, от недуг избавит, и по всей вселенней страшно и славно будет имя Его, Отца и Сына и Святаго Духа, ныне и присно и во веки веков. Аминь.

Молитва вторая

О, Святителю Нектарие, отче Богомудрый! Приими, блюстителю веры православныя, исповедание устен людей христоименитых, собранных днесь в храме благодатию Божиею, в тебе живущею.

Весть бо достиже до предел Российских, яко ты, велий во святых угодниче Христов, во всех концех вселенныя призывающим имя твое являешися и от раковыя болезни исцеление даруеши.

Слышахом об иерее, тебе тезоименитом и храм во имя твое созидавшем со скорбьми велиими. Раковою убо язвою грудною поражен бе, крови на всяк день точащейся, и страждаше люте, дела же своего святаго не оставляше.

Внезапу ты, Святителю многомилостиво, с небесе сшед, ему во храме предстал еси в видимом образе. Он же непщуя тя собрата едина от смертных быти, прошаше молитв твоих и рече:

«Боляй есмь вельми, обаче хощу святый олтарь наздати, да поне единожды святую Литургию вкупе с прихожаны совершу; послежде и умрети готов есмь, смерть бо мя не страшит».

Ты же, отче, безплотен сый, слезами лице свое орошаше! и объем страдальца, лобызаше и глаголя: «Не тужи, чадо мое, яко, болезнию испытан, здрав будеши. Вси убо о чудеси сем ведати имут».

Он же, исцелен быв, абие разуме, с кем беседоваше, тебе невидиму бывшу.

О, великий угодниче Христов Нектарие! Храм оный свершен есть ныне, и чудеса твои аки море преизливающееся умножишася!

Мы же познахом, яко молитве праведника должно поспешествуемой быти усердием нашим к службе Божией и решимостью за Христа умирати, да здрави обрящемся.

Молят тя, отче праведный, болящая чада твоя: да совершается с нами воля Божия, благая, угодная и совершенная, не хотящи смерти грешнику, но еже обратитися и живу быти ему.

Ты же, провозвестниче воли Божией, исцели ны благодатным явлением своим, да велик будет Бог на небеси и на земли во веки веков! Аминь.